



大灶

工寮的邊仔，有一間誠大的灶跤厝，內底有十口煮食的大灶，兩口公家一枝煙筒，攏總五枝，排齊齊倚佇牆圍的外壁。

灶跤厝有三扇門，前門連去鋸柴的工場，後尾門有遮雨的亭仔跤，迴去工寮的房間，邊仔猶有一扇較狹淡薄，會當通到厝外便所恰菜園的小門，門邊有一窟六尺長三尺闊，深到胸坎用磚仔鞏的大水缸，對外口承山水入來，據在伊流袂煞。一枝公家用的匏稀浮佇頂面，親像船仔按呢搖一下搖一下。

灶跤厝的中央有十塊圓的、四角恰長篙形的食飯桌，桌邊毋是長椅條就是椅頭仔，一家一款攏袂相偈。下晡五點煞工，十伙家的大細漢拈來食飯的時，貯飯、夾菜、碗箸 khin-khin-khiang-khiang，比菜市仔較鬧熱。

煮食無咧用塗炭，嘛免依柴，顛倒愛去鋸台跤，抔鋸屑來燃，是有較無全淡薄仔。

逐暗欲暍的進前，先共大鼎提去邊仔，踎灶內園一橫一直頭尾相鬥的柴箍，像屈尺角按呢，干焦一頭捅出來灶空的門外。繼落來，共鋸屑倒佇柴箍的邊仔坵予溼，那倒那潑一絲仔水，予伊小可澹澹，才出力舂予實實，上尾才共大鼎架倒轉去。隔工透早欲燜飯進前，先共彼兩枝圓柴箍換掉，換園引火的幼柴枝、紙網才點予著。

灶內的鋸屑會著(tòh)規工貼貼，熱度誠齊勻，用來燃水、炊粿上合，若欲愛較大火炒菜，另外添柴就隨猛起來。著到煮暗頓、燃洗身軀的燒水煞，嘛猶有火屎咧爍，實在誠利便。

舂鋸屑是查某人的工課，若毋是阮阿母就是阿姊。閣再講，手賤的我傷矮，嘛無彼號氣力通舂。毋過我會搶欲去抔鋸屑鬥無閒，手提畚箕沿路穢甲一四界，定定予人罵甲欲臭頭去。

灶空下跤的火焮濟，四、五工愛清一改，未清的進前，是囡仔炆番薯的好所在，揣一、兩粒莫傷大的，擊(khian)入去內底，聽候鼻著芳芳的番薯味，就有點心通食矣。彼陣，若有囡仔踎佇灶空前，目睷金金直透繩，若毋是番薯，盍有啥通等咧？

作者：藍春瑞

☆詞彙學習☆

【亭仔跤】tīng-á-kha：騎樓

【磚仔鞏】tsng-á-khōng：以磚塊砌成的。

【匏稀】pû-hia：把曬乾的老匏瓜切開做成的水瓢。

【長篙形】tîng-ko-hîng：長方形

【椅條】í-liâu：長板凳

【椅頭仔】í-thâu-á：圓板凳

【拈】khinn：聚集

【依柴】hiannh tshâ：抱著薪柴來燒

【抔】put：把粉末狀的東西撥進容器中

【屈尺角】khit-tshioh-kak：直角

【坵】thūn：填補、填入。

【實實】tsát-tsát：填滿、密實。

【燜飯】būn-pñg：把蓋緊的米飯蒸熟。

【紙網】tsuá-in：引火的紙團。

【實捅捅】tsát-thóng-thóng：塞得很滿。

【著】tòh：燃燒

【猛】mé：(火)旺、烈

【火屎】hué-sái：燃燒時產生的小火花。

【賤】tsiān：指小孩好動，靜不下來。

【罵甲欲臭頭去】mē kah beh

tshàu-thâu--khi：罵翻了。